



懼菴集二

詩

七五

16  
2334  
2



和  
號 2884  
卷 一 2



懼庵先生文集卷之二



詩

挽李僉樞憲復

南厓白屋任蕭蕭黃髮人間萬慮消  
幾几常尋詩禮訓柴扉遙隔市城囂  
儒林長德曾推望樞府恩榮不待徵  
煙火終非仙儷界尻輪誰挽玉京朝

寄贈崔生乞竹

山家曾見傲霜姿玉立牕前箇箇奇  
莫惜兒孫分野老曾襟俗氣十分醫

敬題圃隱先生畫像雜帖後并序

永陽龜溪鄭生家失火圍隱集亦入於灰  
燼獨其卷中畫像一張紙飛掛於園中樹  
梢四面火痕不侵於方圈圍內吁其亦異  
矣哉無奈鬼物扶護於冥冥之中而烈火  
不敢逼者耶鄭生奉以糴帖之期以永傳  
要余數句謹以近體一首塞其請以寓欽  
慕之忱

山斗精神水墨傳百年尊閣弁遺篇分明鬼物猶冥  
護半夜狂炎不敢延身後丹心難化土圈中圖像亦  
凌煙侑孫至意糴新帖長使來人髮竦然

挽鄭縮窩一銓

淳雅風流迥出羣薰陶知自大方門鶴姿並與中心  
潔花甲仍隨邵德尊上舍浮名猶小事中樞天爵是  
洪恩人間莫恨螟兒天肯構故堂幸有孫

濫入道薦承 召命將赴京次孫雪坡肅玉  
贈別韻

點檢平生夥悔尤不才那意 聖明收虛名還覺貧  
為病謬薦偏羞學未優 恩命極知難冒竊行裝非  
敢故遲留賢良故宅人多抱會見 清朝贊大猷

赴 召中路吟一絕

白頭行色冒炎威為重 恩招不敢遲一次 天門  
登對後歸期應在菊花時

筵對退後有吟二首

滾滾閭闔九門通咫尺 龍墀五彩濃慚媿平生無  
學術一言無足動 宸聰  
時務何知白面生 邇筵敢引聖言呈芻蕘幸見  
明王取從此微臣至死榮

筵對後歸路有吟

對罷 龍墀七日回遲遲行色漢江隈山林應有高  
人笑不有忠言往復來

歸路承 除授之命非分之 恩尤不敢承

當即欲下來而有涉望望之嫌意欲謝 恩

後辭歸未晚故更為回馬赴京吟一絕言志

除官 恩命有難辭羸馬旋尋紫陌遠故里黃花休

笑我歸來未晚數旬期

入仕日吟一絕

青袍烏帶束全身投刺公門禮數新白首折腰堪可  
媿始知靖節最高人

入直時馬上口占一律

仁天雨澤及枯查遲暮榮光春後花半減瘦腰圍角

帶分明白髮戴烏紗山林或恐高人笑街路還羞下  
卒呵只爲 聖恩多感激故山歸計漸蹉跎

直中遣懷二首

家事非關官府居自憐羈患未全除新孫璋瓦無分  
別阿子詩書幾卷舒十世先塋違灑掃一門親黨閭  
音書衰年謾被浮名誤還媿人情太闊疎  
官齋無事似家居九陌黃塵強半除庭滿紫花須得  
句牕開棐几好看書階梯豈待三年限身世猶間十  
日餘吏隱高名非敢擬自知幽致未全疎

贈李掌令養重鎮宅二首

洛城千里客汝社百年交斗祿君非戀 天恩我豈  
微鄉音旬月斷秋夢五更遙賴有慇懃意旅牕破寂

寥

白頭爲遠客青眼有親朋鄉信遙千里交情倍一層  
抗言君有志監事我無能乾沒須存戒窮通分劑仍  
余所掌在假監之職故詠一絕以自嘲  
邦家爲設考工監凡事要須著實堪別有假監添一  
座不妨尸素假名參

親舊以余泮主之貧勸移他所余笑而不應  
仍吟一絕

懼庵文集卷二  
三  
炎涼世態已多變肯爲家貧謝主人梁上君看歸舊  
鷺年年不厭主人貧

訪族弟李海南顯甫運春旅館顯甫拈示門  
字韻要余步贈卽吟以塞請

百代親親自一門况吾孤族若干存子姓誰非連氣  
血支流不是別根源孱裔尚餘先世慶遐鄉俱被  
聖朝恩放燈共討微衷激千里歸心未敢言

退溪先生祠版將向奉祀孫任所歷路抵京  
城自 上使禮官致祭多士祇迎百僚駿奔  
實曠絕 恩數也樹仁濫厠道內執事之列

欽觀縟儀不勝聳歎聊詠近體一首以志

澤及玄孫墨綬榮先生祠版路京城生前不盡南山  
戀身後應伸 北闕誠致侑 洪恩千古曠祇延盛  
禮滿朝傾明時尚德於斯至基業無疆億萬齡

菊

我來考工府適值重九日忽見數叢菊當牕階上列  
黃黃始開花可愛凌霜質我起循階除摩挲重歎息  
爾是花中隱從古有題目山野幽僻地結根於爾合  
如何來此爲城市囂塵雜可怪貞正姿有嫌干進入  
詰問旣移時乃覺非情責非爾違素性爲人所栽植

雖來官府中不是自求得中操苟自保何處非所適  
終不與桃李春花爭先發古有城市隱所處何須別  
爲爾勤解嘲知爾惟我獨從今結爲友相看終日夕

黃紫二菊吟

紫菊生於黃菊邊黃菊猶遲紫菊先由來正道多遲  
就遲就方能耐久全

謾詠

自慚愚陋質叨荷 聖恩多斗米徒虛費青袍亦已  
奢鄉愁添白髮詩興對黃花鎖直空齋夜臥聽五鼓  
過

商山李典籍瑛除咸鏡都事將赴任洛下遊  
宦親知多以詩贈別惜其年少才行之士屈  
於散官不佞適巧違未克送別追和李監察  
秉烈贈詩韻以慰之

關河千里不須愁我道君行得意秋天借清閒無事  
爵地宜名勝少年遊青春佐幕元非屈白首潛郎此  
可羞遲暮相逢旋有別洛城秋日獨登樓

客愁

九秋新月色千里暮年情有夢歸鄉并無書到洛城  
方知爲客苦不信做官榮賴有詩中趣黃花入眼明

數番入直後歸意已沒而以騎率之未到少  
稽時日聞有一臺官以僮侗等語見加故不  
覺一笑仍成二絕

僮侗二字善形容可見臺評自有公從此晚年題目  
好不妨自號僮侗翁

為憐疏逖自蓬門微分難堪 聖旨溫始覺含弘天

地大庸庸此物有何存 臺疏 批答以所存二字庇

藉微臣自願愚庸不勝惶媿故云

見家書

客榻驚愁夢鄉廬送好音先看平一字大覺勝千金

書喜阿兒筆衣憐少婦針始知今夜寢方可穩披衾

棄歸

京城數月曳裾遲為重 天恩未復辭匹馬今朝南

下路沛然歸意自家知

在京時孫雪坡肅玉又步前九字韻寄贈曲

江鄭進士晦而灵亦次是韻同贈僕迫於歸

期未即和歸後謹次以謝

向來行止只招尤暫出荆扉跡未收三 召難辭

恩數曠一毫非曰行能優曾嫌 聖世為長往旋覺

名場不可畱屑屑往來東海老故人應笑欠謨猷



挽鄭丈一鑽

梅山未及炙春輝古韻猶看玉樹奇詩禮祇承君子訓棟梁虛老太平時光先宿願無餘債稀古天年不短期最惜仙庄遊賞計雲車先向玉京之

挽李命安鼎凝三首

旃檀一樹大如樟人道奇材是棟梁畢竟同歸凡草木雪蒼斜日古壇涼  
孝悌名家福履期云胡仁壽未躋耆雖然五十猶非夭夏有兒郎多俊奇

我行千里君將之君向九原我未知千里我行歸有

日九原君去何時歸

鄭府尹元猷有詩五絕以詠朴君時平五六  
世世德朴君要余追步別為五言古風以塞其請

昔我龜巖公摠衣巖棲軒一時稱高弟章甫所共尊  
况此雞林域至今遺愛存創立先賢祠儒化終難緩  
當日桐鄉士有誰親炙薰常恨百載下孤陋無所聞  
忽此滾巷裏客來自孝村出示敬靜子五絕詩七言  
言其六世祖學問有本原武城弦歌日詠歸泗水濱  
從容函丈間斂跡名利紛及遭梁木摧悲痛將有文

優游以沒世趾美在後昆匪躬衛素王不辱兵火燔  
義倡赫居廟千秋肇苾芬世德足可尚此詩所以云  
令人三復玩起此老病悒昔賢遺澤地師道可尋源  
歷觀嗣後蹟可驗遺風敦惜哉湮沒久曾無士林論  
拙吟聊續貂以贈故家孫

挽李汝清憲白

滄桑人事淚盈眶送盡江天鴈一行長歎儒林今寂  
寞謾懷琴巷舊我洋真淳性質善邊幅詩禮家庭學  
大方甘守丘園安分劑早辭場屋厭奔忙銀臺遣子  
承天寵竹塢移家伴月光半世簞瓢貧匪病殘年

岳鼓樂無央孝尉未及專城養仙輅還催萬里裝到  
底親朋如有失况茲情志自非常青春託契相追逐  
白首離懷倍悵望多感鞭驢經過路頗尋羅雀閭寥  
堂自茲陳跡成千古何處青眸更一場一曲山陽無  
限感寢門斜日寫哀章

挽權聖文鼎煥

曉月空梁憶舊顏塵愁曾不上睂端平生剩保丹田  
好晚計何傷白屋寒桑梓故墟移几榻蓬萊何處倚  
闌干山陽一曲無窮恨飛盡秋風棣萼殘

烏石亭李友元述亭號

龍田處士臥茅亭晚計烏公與石生日裏陽精玄古  
色雲間老殼文人形虞庭孝感傳奇躅栗里神交挹  
醉名世外等閒公物棄山中畱與主翁并數羣每自  
西林至片面常從北麓呈心爲忘機能狎戲身緣不  
動更堅盟聯翮白屋猶公道磅礴寤屋宛故情最愛  
幽棲隣寂歷偏憐瘦骨共崢嶸緇非涅也全天賦磨  
不磷焉見素貞上苑一枝無所望建康三品肯同評  
吉凶或有先人報輕重元無與物爭閭處文章還可  
見靜中魄磊輒相傾看來頓覺閒愁遣枕處猶甘晝  
夢成滄海霜毛何必玩鍾山鏗韻不須聽或還或往

皆眞率相望相親無送迎子夜啼堪傳樂譜南山爛  
可和歌聲爲羣異類應非樂寡友窮居自不平安得  
共君兼二美兩忘身世送餘齡

忍窩族父闕制後居外寢有感慕之懷詠一  
絕以示余謹忘拙以和

彩舞當年白髮垂承懽幸及六旬時窮天至痛猶多  
間寬譬公懷以我爲公則承懽膝下在於耆年而顧  
此孤露之痛在兒時故云

次李戚洛應奎五見贈韻

支離浮世喪吾眞自笑昂藏無用身鏡裏衰容空對

雪床頭懶習任生塵荒年尚記清和節華戶偏驚故  
舊人芳草綠陰猶可賞詩家興味未全貧

次崔生見贈韻

晚來詩思懶成篇驢背風流媿浪仙每惜春光催九  
十自憐霜髮強三千生涯已擬康衢老經濟應須盛  
世賢窮巷未全無好事故人瓊竹有時傳

題聖留窟片石

崔進士景至遊關東取聖留

窟片石而歸示余蓋聖留窟宿昔飽聞欲一

遊賞而未遂者摩挲諦玩仍成二絕

人自煙霞窟裏回蒼然片石袖中來窮廬半世無聊

客頓覺今朝青眼開

平生聞飽聖留奇一片瑰形坐得之一羽可見文彩  
異鳳凰全體不須窺

玉院會中次南進士子雲景采韻

邂逅故人來覺堂勝會開春光多澹蕩詩思覺胚胎  
聽水襟仍洗看山首幾擡清談猶未了分手故遲徊

翼日將罷歸

聯袂春睡濃朝起已高春可柰將分手不妨暫住筇  
洗襟須活水得句倚蒼松臨別仍相勉同安有古鍾

挽權益謙五首

郎署厖眉是好姿男兒終古數多奇偏憐廿載爲貧  
仕畢竟窮廬旌櫬歸

遲暮深知世路艱宦情家累摠非關悠然脫屣尋仙  
去好是丹山碧水間

逆旅羈覓且莫嗟浮生元是宿桑過許多病死家人  
手行路操文復幾何

輕重能知內外分多君踪跡謝朱門何妨世俗嗤迂  
拙自有人間識者論

重泉絡繹故人輿俄者隨君又太初如使故人靈有  
識還憐人世若干餘

挽李文洛範

也宜舒嘯盤桓處蕭灑荆扉遠俗譁先院偏濶宗仰  
慕古嚮遙和太平歌清貧活計安吾分天爵 恩榮  
謝外華月社光儀今寂寞東都耆德倣於何

九月十六日卽吾生朝而今年又是回甲也  
兒子爲設壽酌有感詠懷

流光儻忽六旬催孤露生年月日回風樹餘悲空隕  
血桑蓬夙願已成灰常嫌一命叨非分敢恨明時棄  
不才卻歎衰遲成懶習習中依舊有塵埃

次旌隱權君範龜韻三首

旅榻忽相逢聲華聞已早昂昂野鶴姿媿此一凡鳥

又

白頭扶短策踰越幾岡巒世德青城舊生涯旅榻寒  
交情無老少詩興不孤單晚節相期處黃花霧裏看

又

并州到處摠家鄉莫道家鄉道路長百世猶能歸故  
國殘年何必陟高岡浮生大抵皆羈旅萬事如今已  
夕陽籬有黃花罇有酒莫將愁思攪詩腸

奉和尚忠祠奉安時會中韻

男兒忠憤濟時艱不斬長鯨誓不還萬里殊勳鑿海

外百年公議士林間長虹壯氣衝南斗故壑新祠重  
華山濟濟裸將瞻仰地分明海月是公顏

哭崔卿玉歸路口占

六空堂上性安來卿玉如何去不迴相逢每道仙區  
勝一約那知鬼物猜湖山物色空如畫詩酒風流已  
化灰半世襟期數行淚夕陽驅馬獨遲徊

謹次是庵任公華世墓道豎碣時韻

松湖風月至今辰先輩聲光尚未陳青雲仕路無知  
已白石山阿有主人鸞驂已返三清界蝶夢誰尋太  
昊春三尺龜趺追建地子孫奚獨感懷新

挽李參議鼎德

公來若與大人期太歲涖灘慶會時中道又隨  
龍馭去人間萬事哭公私

謝孫肅玉贈青竹杖

故人憐我漸衰羸為贈牕前綠玉枝松逕獨隨明月  
夜荆扉間倚夕陽時化龍未學仙翁術扶老空吟處  
士詞軟腳從今行十里江東雲樹待佳期

挽畸窩李文象遠

聖代終虛老名家故有孫天姿儘豈弟家學好淵源  
浮世少知己僑居晚避喧殘篇咀古訓先藁泣餘冤

恬養常關戶沉澗素寡言貧窮分已定年德望俱尊  
到處能安土他鄉便故園那知積善宅旋作萃殃門  
不盡西河淚幾傷東野冤尋常無况緒排遣有清樽  
天上催仙馭人間謝寓軒平生磊落氣埋沒寂寥村  
後進尋文獻誰從聽緒論荒詞替一痛西望哭聲吞

挽族弟道叔四首

庭訓君承好古翁一家詩禮有餘風堪嗟連代清修  
士埋沒空山草莽中

浮名得失視尋常逆旅寄歸無短長如使鄧攸終有  
子時人不必怨蒼蒼

浮世從吾殿十年歸期奚獨在吾先歸期我亦知非  
久其柰相思蓋棺前  
相念貧病有殘書衰晚年來共卷舒此樂人間今不  
復若爲消遣此生餘

庚申除夜詠懷

非爲庚申苦不眠老夫情緒又新年春暉欲報終無  
地 龍馭難攀遽上天白首弟兄風葉散青氈基業  
海桑遷池塘詩句傷春草江渭盃樽隔暮煙萬卷詩  
書違素志別區雲水負仙緣新庄未就三間屋南畝  
誰耕數頃田塵冗謾教兒課廢風邪偏遣內憂纏從

知分數皆先定萬事都將付自然

見年少局戲書示一絕以戒

爭奇鬪巧欲何爲謾費光陰一局碁百勝終無毫髮  
益妨工喪志最堪悲

孤坐謾吟

清貧自與俗人疎咫尺庸衢便隱居寂寂柴門終日  
掩不妨閒坐獨看書

次李用晦韻二首

相逢江上村聯袂到鬢軒五老堪傳畫三山欲與言  
分明中夜夢重對別區樽歲暮離羣恨愁聽獨鳥喧



落照明漁村相尋竹裏軒逢場如有約歧路卻無言  
臘雪添雙鬢江雲杳一樽若爲從子所盤谷謝煩喧

挽權來應龜煥二首

老松瘦竹魯溪濱蕭灑茅堂有主人人去堂空松竹  
在暮天寒月見精神

如公窮獨不須悲從古文人命道奇百世能伸追遠  
慕也應無憾九原歸

曲江新榜進士李君孝相卽吾同宗也赴聞

喜筵鄭進士晦而吟近體一首以示念拙和

呈

紅蓮十丈見烏頭老眼分明宿霧收樽酒客霑明  
主渥煙花僮奏太平謳長郊草色聯衫翠九曲江聲  
和遂流兼得座中文誼好暮年歡笑一場遊

挽李公亮鼎寅

蓬島變桑舊號畱地仙來自雪山秋故家詩禮傳長  
物浮世功名笑附疣一樂曾非南面比多孫又是子  
儀儔韶顏不似塵寰老雲轡還應閬苑遊向日芳馨  
聯棣萼幾年零落盡山丘八旬華甲無疆福九夜行  
裝不足愁只有山陽歌一曲更添離露淚雙垂君居  
康社新移并我宅臺庄近辨牛老去身家偏艱厄邇

來情地倍綢繆青山不盡收知舊白雪誰將更唱酬  
龜社相邀成故事虎溪佳約自今休梅牕有信回春  
意蓬巷無心出白頭可喜藍田多寶樹不關冀北老  
華驪漳濱蒿里遠相送江樹應含別恨悠

南進士子雲崔進士景至南復來汶亭子雲

次板上韻要和余與景至繼和時則壬戌暮

春既望也

暮春者汶上青眼爲君開談席慙慙合詩筒絡繹回  
佳期難再得歸意莫相催明月今宵在何愁白日頽  
乞得梅友來植階上二首

倚杖柴扉青眼揩一株瓊樹伴童來慙慙老子栽培  
意要見寒葩雪裏開  
從我新基更有誰梅兄知己許相依吾儂晚計於斯  
足莫恨門前人跡稀

挽李持國鼎扶

遽然中夜夢分明故人儀若非鬢齋會定是禪社期  
團圓文酒席歡如平生時喔喔一聲裏驚起涕沾髭  
可憐吾持國儕友雅望推名賢故家裔淳默好天姿  
孝友源百行詞翰又重之其器非不利荆園柰數奇  
元無必得心何曾到老馳到老猶不倦案上書與詩

詩書為長物傳之有兩兒鄉里罕見面園圃足自怡  
優游以卒歲微斯吾與誰託交三十載襟期許相知  
相逢討論處不是拍肩嬉及此同衰暮非復曩時隨  
十里雲樹隔動輒時序移那知人事變奄忽至於斯  
半百非仁壽一疾竟難醫同堂聞喜席還聞屋呼悲  
賢門稠疊痛昨送承宣輻慶弔相泐沈遠近所同咨  
此行將即遠便成千古離白首人間友悲不幾時遲  
夢寐知不虛應是發於息屋梁落月吟聊添齷齪辭

挽崔孝如璣

忠賢奕世好家聲六十光陰老太平竹塢課兒書滿

架棣床湛友酒盈觥華梁賀燕三春晚仙路歸驂白  
日驚雲樹多年仍此別上元明月若為情

謹次孫肅玉家傳雞川君御賜三寶韻

霄漢恩波滴水分玉龍吞下雞川雲墨池雨露流

右硯滴

餘澤故宅彬彬幾世文

天上琪花瑩不斑何年結子落人間勳盟不重黃河

右珠纓

帶一串纓珠報寸丹

弔詭神鉞或躍如飛飛學得化龍魚何如一片君家

右刀子

寶十世恩光照有餘

次鄭進士晦而韻

男兒同老太平辰湖海逢場氣槩伸  
半世襟期猶淡泊三春物色更清新  
光陰惜我愁中遣學業多君妙處臻  
暮境偏濃雲樹忠便風無惜寄音塵

弄孫歌

笑矣乎六十五歲翁如今始見兒孫生  
翁抱兒孫坐夕陽無限欣喜情  
既而長歎發一聲待兒成長日夕矣  
翁已去佳城去佳城亦何嗟  
惟願兒孫無恙長他日學業成

忍窩族父得藤木杖一枝頗有奇文甚愛之  
詠一絕以示忘拙和呈

登軒驚卻蜿蜒蛇熟視孤藤戶外斜  
九節遠從仙鶴洞輕身不待喫胡麻

家有柏木杖無文彩可觀惟取質直仍復吟  
呈忍窩族父

文章未有近龍蛇天質猶能不曲斜  
好是夕陽村巷裏相隨步步訪桑麻

從弟嚮五回甲吟四首

四老人間三百年蒼顏皓髮一行連  
仙風敢擬商山隱自笑同堂四老圓  
孤露餘生并七旬白頭相對血霑巾  
至今風樹無窮

懃吾輩還為久視人

大抵乘除分有常莫將貧困怨蒼蒼向令吾輩能安富未必如今共此觴

閱盡風霜半百年人間萬事已知天從今活計應無幾祇有殘書數十篇

次曲江倅文會韻并序

曲江李倅得江設文會相邀甚勤余與南止淵仲殷往焉觀其所居軒外鑿池種蓮其中作小亭以壓之亭傍設假山像金剛山又鑄銅成筒懸流作瀑布聲坐間取蓮

葉酒一封以進真吏隱風味也試士後再宿而歸歸後李倅以四韻詩見贈遂念拙

步謝二首

江城吏隱簿書稀君子新亭耀彩輝  
灑灑流檻掛灑灑葉酒酌含醅  
千秋慶節仍開席十載幽蹤暫出扉  
秉燭連宵未盡興夕陽驅馬遲遲歸

杜巷深深人跡稀海天梅月送餘輝  
金雞古樹欣傾蓋玉井新華好襲馡  
東閣日長開藝苑西峯地縮對禪扉  
至今夢寐煙霞趣疑是身從別界歸

詠懷示烏川童

此物元非道所存求師何必我之門向來魚魯粗分  
別老去精神大半昏脩束固辭還迫切經帷強說柰  
支煩人家好子能無誤患在為師古聖言

挽權同知昌祚進退格

積善工夫巧鍊丹君看八耋駐童顏眉齊老婦重回  
禮頭點兒孫每問安詩酒風流非俗韻紫緋華秩是  
仙班人間三達將安做悵望雲車向汗漫

挽蔡子文奎

皚皚山色遠囂塵處士幽庄竹樹鄰長枕白頭同氣  
友一床黃卷古人親荆園落拓關時命農圃逍遙任

素貧從此海山遊賞路樽前誰復倒迎賓

次趙同知柵柝回榜宴韻二首

上甲蓮華籍重逢上甲年青衫 恩復帶黃髮畫堪  
傳再舉呂巖客三尊洛社賢仙風餘百世松鶴覩爭

先

青年司馬客白首更青年 北闕重華照南闈舊榜  
傳已優天畀爵何恨野遺賢君子無疆壽重重甲後

先

挽李潭陽憲儒二首

雞林仙鶴洛江臯蘆荻蒼蒼歲月遙胡不歸來歸碧

落夕陽華表謾招招

黃驪逸足擬青冥百里殊非遠到程十載專城俱慶  
養斑衣墨綬亦云榮

挽李養重

世人榮君青雲路柏府清華近蓬瀛世人榮君五馬  
駕松都名勝古王城別有平生故人爲君榮不在青  
雲路五馬駕只在塞北三千風雪程人生顯達浮雲  
耳誰知 聖明恩譴庸玉成嶺海自古多君子七十  
生還亦云亨逆旅可是無餘憾送君何必涕霑纓

挽鄭進士文希 夏潛

杜巷白頭西望哭故友傍人還笑白頭癡渠且同歸  
無朝暮何暇更爲他人悲此言大抵達於理此老非  
不知可奈一日未作同歸客不爲斯人哭之慟慟爲  
誰斯人卽我平生知己者奕世賢門生此好箇姿旣  
有好姿重以詞華美雅望曾爲儕輩推浮世功名元  
有數小得奚論蓮一枝好是菟裘傳守地肯構精舍  
紫湖溜暮境非關人世事一壑煙霞聊自嬉案上經  
訓窮究處故家風韻餘墳簾詩禮青氈且分付庭畔  
寶樹次第奇吁嗟非龍非蛇今之歲斯人之壽止於  
斯卻憶青春託契始東廂委質近我一門楹夤緣華

旆源源到握手逢場頗有時  
媿媿論討輒忘倦臭味  
不啻蘭與芝年來衰病苦相阻  
一嶺雲樹懸懸患前  
秋一札寄窮巷滿幅無非慙  
懃辭苦待清和好時節  
扶杖盤旋是前期卽今正是清  
和節好鳥嚶嚶芳草  
鼓云胡人事忽已變滿目風光  
增淒其千金舊札尚  
在篋一字一涕空垂垂老無新  
知舊交凋已盡踽踽  
人世將何爲青山底處理玉樹  
羸病無路送靈輶長  
號一聲嗟已矣他日相逢只在  
九夜達

挽李都事憲愚

漢樹蒼蒼漢水連  
招招覓魄洛江邊  
洛江亦是非吾

土覓方歸來歸雪川  
一本方作魄來作數

次甲山孝婦閣重修韻二首

誠孝須看倉卒時  
頑童誰使惻然悲  
曹閭不待黃絹  
解絕好爨書六字碑

欽慕芳聲自齷時  
古閭風雨每過悲  
玄孫肯構誠深  
篤從此生光數尺碑

挽趙同知

童顏不學鍊丹仙  
積善陰功紫籍編  
松鶴風聲非俗  
韻樵漁興味是家傳  
陞資 寵渥追先世  
回榜榮名  
歷少年昨夜忽驚南極晦  
人間三達夏誰全



丁卯三月三十日訪鄭南窩季常東弼於溪  
堂一宿而歸於其別也畱贈一絕  
忽聞此日春將去急向山中訪故人相見故人一笑  
語不爲虛度今年春

次孫肅玉追詠玉山會韻并小序

前歲臘月望與江東西八九老會話于玉  
院而會中無金谷酒令是蓋急於談討不  
欲令人聳肩捩鬚作苦澀態亦澹然真率  
底意也歸後竊欲以數句語傳筒追補風  
流欠事而緣頽惰未果肅玉先獲焉豈不

欣倒歎賞謹次瓊韻以呈第驪龍鱗甲非  
領珠之敵此則惟在君恕之也

長吟雲樹守空堂歲暮佳期一會場九老閒情明月  
夕大賢遺躅紫溪陽猶疑洛社風流席不羨蘭亭水  
曲觴卻笑向來年少事漢城風雨共奔忙

又以別後思想之懷吟成一首添足

悄然回首紫溪堂三宿園圖一夢場俄者林巒飄白  
雪卽今時節轉青陽若爲知己重攜手相與論文輒  
倒觴賞及良辰須勿失春光如客每忽忙

謹次屏庵盧公奉天殉節時韻

忍說崇禎赤鼠牛 大明臣子一天羞  
兵前獨有詬 噪口城下終無敵  
血喉湖上月來東 海影竹橋風送 睢陽秋至今激烈  
山河句長使人間志士愁

訪止淵溪堂留贈主人南仲殷景義

造物於人獨靳閒三公易得一區難  
世間難得君能得騎鶴何須得好官

丁卯除夜兒子病劇數日得差因吟一絕

新歲吾年古所稀人間萬事摠非希  
惟希一子尚無恙好向庭前舞彩衣

戊辰六月晦以文會考閱事會于玉院孫肅

玉以忌疾未參以詩寄悵惘之意歸後和呈  
佳期每欠故人同長為西神怨不窮浮世希音傳白  
雪高樓興味助清風年來媿我多烘狀老去多君夜  
燭工安得一樽談討樂人間萬事擺忽忽

挽崔漆原心健

天意茫茫未可知斯人胡遽至於斯英華始驗栽培  
理霜露旋驚短折期三載微官猶自效千秋傲吏彼  
何為相逢有淚東都士不獨沙梁一門悲

挽崔君常宗慶

龍山好會謾經營此日如何送子行一代老成儒者

味百年清白故家聲芝蘭可驗無窮蔭蓮桂須看未  
艾榮遲暮親朋誰復是邇來小阮亦佳城

挽東山孫文五首孫文祥於詩尋常說話每

及於詩故挽語亦段段提綴

人間齒與德兼尊三達三分有二分莫道一分人爵  
欠浮榮元是等虛雲

滿腔都是惻然仁今世誰知有古人看取明時遺佚  
惠猶施凍裸與窮鱗

古人情性古詩風好處須看淡泊中白雪未全無和  
者青雲知已有泥翁洪判書良浩序公詩集

東山今古較風流絲竹何如翰墨遊畱取篋中千首  
詠一生功業勝封侯

詩債人間已盡酬鸞驂何處采真遊碧桃千樹琪花  
雨遙想山肩倚玉樓

挽孫乃貞容九

黃梅細雨山陽遠疎雅風流憶故人浮世奔忙非我  
事一生閒放任天真雲間已了高亭興海上應尋閩  
苑春賢季賢咸餘白首老懷將與說悲辛

擬梅湖孫公贈南寓庵體寄濟州通判孫山  
甫應虎

孫山甫吾嘗聞乃祖梅湖公有詩贈別南寓翁寓翁  
舊作耽羅吏片帆將舉溟海風公是寓翁平生知己  
契一曲我洋分手時是詩首尾數百字字字寫盡無  
限息當世絕唱傳樂譜至今膾炙騷人口我送君欲  
贈言虫吟敢擬洪鍾吼三誦遺音三歎息爲君擊節  
竊有一語賀不賀君五斗祿不賀君墨綬挖最是漢  
挈神仙界乃祖詩中拳拳處人生壯觀亟有稱夙債  
應在瀛洲嶼知君此行亦不偶爲吏明時乃於斯分  
明造化翁尚記百年故家奇絕詩故令君越層溟三  
千里辨得雲間汗漫遊男兒投筆大事業何羨班生

萬里戾孫山甫莫永懷我道君行得意秋爲君賀止  
於此一語更有慇懃付借問寓翁遺化地古州風謠  
今存否

謹次雪坡翁換杖吟寄贈古風一篇

東有雪坡老西有杜巷老兩老一生交契淡如水人  
世元無長物好及此同衰暮手中各有一杖枝雪坡  
杖聞說神仙洞裏得有椒其馨胡考宜頽然而長鏗  
然響不事雕飾魄磊奇杜巷杖敢誇道德山中採吾  
栗須吾戰兢持巖臺閱盡風霜苦枯瘦其形猶不斜  
杜巷杖如杜巷雪坡杖如雪坡物主相得似不偶尋

常不許他人挖雪坡老來訪杜巷老一場歡笑對黃  
花兩老臨別默無語只有彼此杖矐然相視手摩挲  
杜巷杖雪坡付雪坡杖杜巷捐傍人莫笑且莫嗔不  
是戲嬉好博學少年我好君君好我時月不見相思  
猶黯然况此暮境分手後雲樹離懷倍可憐故將手  
裏物要替意中人不妨彼來此此去彼彼此相隨兩  
老身杜巷如見雪坡面雪坡如見杜巷面從此此兩  
老出入動靜無處無時不相見

意猶未盡又呈一首

雪坡杖一枝杜巷杖一枝兩老各一杖尋常行處輒

相隨逢場一笑遂相換分付別後故人思佳山麗水  
逍遙約美景良辰追逐期此杖已證同心契百年膠  
漆應不變不學世人結交須黃金黃金多少交淺淺  
而况朋友之責貴善導不啻冥行瞽有杖于今吾輩  
日暮道且遠努力前程相倚仗媿我懦弱無效益須  
君信實勤輔導世路多艱亦多歧指揮燥濕無顛倒  
此別有意相持贈倚杖狂歌重一唱莫效市上掛錢  
行掛錢亦已放莫效方外荷篠植荷篠亦云固葛坡  
化龍太白解虎何足羨摠是荒誕非吾道千載最仰  
夫子杖叩脛有警原壤夷用舍行藏隨所遇可誦先

懼庵文集卷二  
三十八  
輩銘杖辭屈曲不失正直體杖家杖鄉行止綽有餘  
假號杜陵何敢擬古杖引木瓜聊以報瓊琚

族弟祥應樹發挽辭

吾其忍祥應挽乎挽者悼死之詞祥應其  
果死乎七十之老我不死少於我二十之  
祥應先死死生之理反常甚矣吾寧付之  
於曠達而不欲爲祥應挽也雖然祥應之  
死終有不曠然於懷者夫以祥應豈弟之  
姿文雅之美門親之所期待何如而畢竟  
一名未遂百窮咸萃屢空顏瓢再叩莊盆

繼之以積年沉痾奄忽不救噫噫祥應之  
窮一至此哉若乃親老而養未終兒長而  
娶未及此尤幽明無窮之痛而遠近親知  
之所共悲者也矧余親爲族從而情若同  
堂年間老少而契若朋友者烏可無一言  
於千古設別之際耶此吾所以不忍爲祥  
應挽而不得不爲祥應挽也辭曰

噫吁戲慘乎痛哉祥應胡遽至於斯祥應得年今五  
十五十不稱夭折爲吾今哭之還同少年天祥應之  
死絕可悲天賦祥應亦不貧穎脫其才端好儀夙承

惜齋文集卷三  
二十九  
家庭勸勉意弱冠之年能文詞吾南鄒魯樂育地一  
隊士流咸稱奇父兄倚仗曾不少光我門闈是所期  
邇來廿載巨創後胖合連憾身世崎蕭然白屋貧非  
病二豎如何相侵欺沉綿牀席十寒暑眞元漸鑠肌  
骨羸知命今年長逝去萬事人間棄如遺最是幽明  
無限痛我欲言之雙淚滋有親有親年八耄西日看  
看迫崦嵫朝門暮閭望子精彩衣返面何遲遲有兒  
有兒年已長旭日佳期尚差池慘慘衰服未成人行  
路見之猶齋咨亦有庭傍二三弟教導迷蒙知有誰  
此恨耿耿歸泉下泉下應無合眼時親朋到底輒相

弔矧此情地如何其相愛不曰疎昆季晚契還如友  
于嬉以我蒙昧一日長幾多文字與質疑無論一堂  
同研槩長記詞場共逐馳君居况復返故庄卻喜餘  
年同鄰比有時病席躬往訊款款情話心曲披豈料  
歸期元無定少者君先去老者吾猶支如今往事成  
陳迹何處更覩玉樹姿踽踽白首府仰間長歎吾門  
文運衰庚申奪我道叔去曾未十年君又隨虛堂斜  
日少與晤獨對殘篇無限思楓丹菊黃九秋節此時  
那堪送征輻征輻且莫催前導竟向庭闈不忍辭此  
老人世亦已無朝暮別不幾時復何噫吁戲

戊辰除夜次嚮五弟韻

嚮五弟近寓大朴庄每年除夜必來同寢  
餞迓矣是歲為狂風所戲未得越峴有詩  
一絕以贈故次其韻二首

年來割半痛難堪中夜時時起撫衾浮世餘存猶散  
落白頭今夕若為心

常時離索已難堪况復今宵未共衾獨對孤燈無限  
感君詩畫出老兄心

次雪坡見贈韻

長日空齋睡有餘牀頭驚卻故人書南茶不啻傳靈

草片脯能令卻野蔬物態間中觀變化交情病後識  
親疎年來頓覺人寰小安得仙區與卜居

伏聞元子誕降不勝喜抃詠一絕

海東重現彩虹禎天佑今周慶篤生豈待大賢聞甚  
喜蚩蚩蹈舞秉彝情

次徐清汝活溪亭韻

周王仙界近徐孺隱居濠扁額皆前訓工夫只此心  
苟能尋絕響何恨寡知音野老偏多羨臨風為一吟

挽金悅卿輝祖

孰謂今世上無復好人存須看自好老遐僻巒陽村



此老好箇姿一生任真淳儕友皆稱好豈獨自好云  
好意隨處見流出百行源既有好山水亦有好田園  
逍遙以沒世好向扶老原昔我相與好惜未久討論  
邇來各衰暮幾年賦停雲常恨好顏隔那知惡音聞  
年前哭夢八如今又送君好人去復去何處更慇懃  
庚申四月望止淵翁以玉院洞主要余同宿  
院中是時久旱之餘適有甘霖吟成一絕以  
贈  
暮境懸懸思故友旱天望望待甘霖甘霖故友同時  
至終夜無眠此老心

是歲六月日同南仲殷暨諸友往橫溪時墳  
簾集方就刊莊閱之餘謹次集中韻

桃花古洞挹清塵步步尋幽石逕因浮世七旬無暇  
日別區三宿有今辰皋比已邈藏書地迷路誰開墻  
墳人不朽幸看遺集印也知吾道壽千春

次崔氏孝子公鍾洞壇祀韻

烏啼何意白楊寒不見空山孝子冠風聲足聳三綱  
重天理俱全一死安閭旌幸有遺墟在墓表嗟無  
後日看於彼此乎求陟降屨孫誠敬乃為壇

病起

懼庵先生文集卷之二  
一疾幾乎與鬼鄰七旬翁復起為人起來能復幾何  
久且喜殘篇更埽塵

懼庵先生文集卷之二

懼庵先生文集卷之三

詩

鄉飲禮後次鄭季常韻呈府伯李公米二首

禮編 遺教置郵傳鄒魯吾南 聖化先百拜德將

無醉酒三歌聲好不繁絃偷光客席人非稱忘貴州

家我識賢辭讓此心皆可擴善端看取本絲絲

禮飲須觀鄒魯鄉東隅卿月倍生光一樽太古醇風

在百拜昇平化日長揖讓千年君子國威儀三代聖

玉庠分明立象皆天地政教行看有紀綱

挽權都事昌益

丹山謂有地行仙仁壽如何未百年自古榮名多重  
晚況今優爵復光先游魚觀盡磯邊雨逸鶴迎歸海  
上天好與臺翁行作伴故庭詩禮喚兒傳

次李之翰壽宴韻

杏亭回甲設芳筵重午良辰上巳年青雲紫陌雖無  
分碧水丹丘信有緣多男是福何須富千首能詩不  
必仙高戶田文賓客散莫如今夕醉樽前

挽權退之昌念

吾嶺交遊屈指誰許君才望少年時紅蓮一萼名還  
薄白雪千莖鬢忽欺萬事羊公臧穀路靜觀魚在濮

濠澹幽明此別應無幾浮世殘齡我亦者

挽李大憲鼎揆

雲路孤鶩海鶴姿百年良佐舊家耆 龍樓清讌賡  
歌日翰閣風流草制時天地至今弓劔痛江山自古  
採漁宜寢門白首潛然淚非獨區區爲哭私

挽金文邦潤

儒雅風流一隊推青氈十世未全墮襟懷坦蕩貧非  
病氣貌冲和不衰大耄寧非仁者壽多男自是善  
家祺欲知先誼何如好設語須聽奄奄時

甲山會中次孫進士國甫鼎九贈別韻

會老多康健前期易有時停盃分手處相對不須悲

挽權友

月明滄海夜誰識有遺珠書籍窮千古漁樵老一隅  
舊遊疑夢境此別柰冥途攜友魚臺計今焉已矣乎

菊

可愛庭前菊老夫手所栽金莖承露重瓊蘂冒霜開  
酒味添香絕詩情得韻回餘年清賞足更有臘天梅

紫菊

秋華正色外奇絕化工裁德號眞君降神光老子來  
醉分陶令面粧謝越娥顛燁燁庭前秀分明霧眼開

挽武陵族益燁二首

武陵山下老人道地行仙期以無疆壽如何未百年  
失意暮年業傍通亦一家君看季主說能令賈生嗟

次崔景至白蓮亭韻

霞帶金華紫氣回玉亭光景便瓊臺浣西水檻當魚  
俯峴上山門爲鹿開境接盤龜須曳尾名畱僧社亦  
澹懷仙鄉只在琴書案何必笙歌鶴背催

壬申元朝有感

孤露人間一縷頑忍看今歲復涸灘卻思齟齬攀號  
痛白首那堪血淚潛

懷孫肅玉

十里江村近離違歲有餘長為痘虎窘還與友人疎  
擺脫應無累沉潛只有書何當時氣淨相訪水雲居

懷鄭季常

人在煙霞谷長年不出扉可憐衰暮迫偏忌痘炎圍  
黃卷存探賸鷺塵隔是非前秋重九節一約恨睽違

懷南仲殷

聯枕經三夜分歧又一年家傳螟子娶 恩荷柏臺  
遷已了人間債真成物外仙桃花紅雨裏垂釣在溪  
邊

宗人李華宅於其先祖所植三槐下構精舍  
以寓追慕之懷要余賦詩為亭中故事吟近  
體一首以贈

忠勳故宅有三槐玉友金昆好手栽德蔭已從同氣  
發靈根畱待後人培風聲惜未登 天陞雨澤何由  
徹夜臺誰識孝孫無限感涸灘是歲肯堂開

次雪坡翁寄贈韻與雪坡屢有水雲亭相會  
之約而連有魔戲未遂

佳期每失水雲齋有數仙區一笑諧造物豈終乖好  
事明秋竹杖水東涯

挽權聖晦熙

人與魚臺勝天慳紫海東真淳儒者味文獻故家風  
川上詩情富樽前世慮空浮名曾不屑一樂久彌融  
纔闕三年制仍踰七耄隆青氈須繼繼寶樹摠芄芃  
泉下應無憾山陽獨有恫鶴姿雖罕接蘭臭已相同  
雲水丹丘渺桑榆白日忽有懷難命駕極目謾瞻鴻  
虛負三春節誰招九夜中未須悲此別儂亦秃頭翁

挽鄭嘉山著三首

常山齧舌是前身 聖世嘉山斷臂臣從弟真卿曾  
並美如今父子乃三人

鄒魯吾南節義饒百年無事久寥寥獨青松柏寒然  
後喬木風聲徹九霄

平生莫恨未承顏不死公猶在世間從此青丘千里  
域秋霜烈日摠嘉山

岳溪洪友某歷路見訪一宿而去臨別見贈  
一絕卽次

好客來自好門楣白首逢場聽好詩可惜臨分無好  
意殘年不復易前期

次權明應宗洛韻

水東不是海難超尺地如何百里遙老境謾為孫子

伴佳期每失故人招六塵憐我生涯泊八景多君興  
味調雲樹離懷驚歲晚秋聲昨夜葉搖搖

挽南子雲二首

南厓桐樹中於琴質直而文有古音一曲採蓮非得  
意誰憐白雪響沉沉

白頭俱是故家兒事契非徒我輩隨俯仰滄桑無限  
感相看止老夕陽時

梅花牧丹吟

梅花樹畔牧丹開人道牧丹絕勝梅若使斯言題品  
可許由爲下五侯魁

同忍窩族父守歲

今夕又當除頽齡復幾餘衰容羞片鏡方法謝千梳  
曾次元淡了視昏何病諸我論公可聽案有古人書

挽李國叟鼎岳

白首吾同儕存者亦無幾同吾協洽降君與聲應是  
吾於此二老非獨年紀比雅趣非敢倫拙性頗相似  
蓋此三人者浮世好交誼同得六十九七十隔一歲  
嘗聞七十壽自古稀於世乃於今年春君與聲應逝  
人間一大夢恍然今始悟才華與聲譽君已前塵付  
得失何足論窮通何足道獨恨衰暮境十里隔雲樹

一場文酒會宿約竟虛負恬靜豈弟儀已矣今難覩  
惟有九泉下相逢知不久君歸見聲應此語傳之否

挽鄭晦而三首

北海遺風絳帳垂一方魚隊有依歸人嗟亦近龍蛇  
歲愁寂江樓夜月輝

浮名何必較羸輸南省東堂一夢虛看取自家好事  
業中庸一部有圖書

烏島非奇海鶴奇幾多車馬曲江澹從今海鶴乘雲  
去便恐曲江車馬稀

挽權彝叙東範

默念平生友歷歷皆可數孰如吾彝叙情契濶且厚  
憶昔吾叔祖獎進後學幼君年十二三挾冊攀戶牖  
頭角我稍似魚隊共先後小少仍追逐無處不相偶  
荆園與鬻舍促膝更攜袖并并桑榆迫兩人俱白首  
有時相逢處喜色敷面皦那知邂逅疾遽促七旬壽  
浮世餘老醜誰復青眼覲如君真實姿叔世儘罕有  
怡怡奉老慈兄弟如足手早謝奔競場童蒙亦善誘  
頭點滿眼孫眉齊偕老婦一堂三皓老鳩杖列左右  
優游以卒歲此樂無與耦悠然乘化去逆旅復何疚  
往在清和節令季初度晬我與諸老友聯翩扶杖就



君時在牀褥強起同樽酒臨別丁寧語後會期以復  
孰謂當日別遽隔厚夜九恨不更留連糜積相與究  
吾年亦已稀同歸知不久

止淵壽席二首

千卷詩書萬斛霞山家活計亦堪誇從今有主青氈  
寶兩綬通侯不足華

生世我無兄弟懽陋居無水亦無山羨君白首弟兄  
在塤唱麓酬山水間止翁回甲日率嗣胤於丹山仍  
設宴稱慶

戊辰重陽日南仲殷與朴佐郎鼎元孫竹籬

秉魯會玉山僕亦與焉拈韻得陽字

風流千古足誇張好會人間此一觴龍山未必衣冠  
勝香社無傳日月良丹楓晚菊含盃好白石清泉引  
興長皓首臨歧無限意眼前光景摠斜陽

挽南止淵

多士吾東都自古稱冀北最是汝南宗文明異他族  
寓老與活翁世世傳名德得君詩禮家藍田果生玉  
天然好箇姿穎悟夏超卓一覽記有餘五車書在腹  
弱冠遊藝苑宿儒已脅息三十觀國光搏風始展翮  
謂宜瓊佩華清廟簠簋飾用材無良工楹棟還為杌

子猷笑馬曹馮唐厭郎直名利已無心山水素有癖  
慳祕別一區暗谷生明色一鑑方池邊蕭灑數間屋  
弘景饒煙霞孟嘗富花竹箇中無限趣非爲景物役  
同氣有良朋怡怡上舍伯風物入錦囊唱和填簾櫳  
清朝柏府除頭髮先皤白天上玉樓招巫陽何催  
促榮枯付南柯仙遊在廣漠斯人不復見今世誠罕  
覲風味挹醇醪詞藻猶糟粕平生一片襟淡淡止水  
若孝弟行有源學問推餘力環堵乏瓶儲滿案皆經  
籍俯讀仰而思默契人誰識眞率本無矯行已自寬  
綽迂拙亦何傷生涯任淡泊世事都無關一念在獎

學鄉塾有主盟鑑衡咸推服年齡雖向衰氣貌未甚  
爍稀壽終未躋誰謂仁者得靈櫬自故庄行路猶憾  
憾暮庭啼孤螟空牀怨寡鵠歸然舊溪堂物物傷心  
目學子失仰望迷路疇秉燭鉛筆未了債幾多案上  
積計出遠邇驚有痛此老哭兩家先人交事契自宿  
昔易世逮後生排行好追逐不慚鴛鴦蹄與羣騏驎  
足少壯情非疎遲暮意采篤玉洞秋月夜汶水春風  
夕隨處好相觀不是肩被拍有時款段行乘興訪剡  
曲伯氏在中堂鼎坐參諸益吟筒輒相傳呼童書諸  
冊山中故事畱君言况如昨此事俄往間果已故事

作那知二年來棣華并零落况復今夏晤在君宗姪  
宅談笑宛如前疑義亦相確分手未一旬遽然聞皋  
復亦我嚮從歸與君數日隔支離吾不死君灘此何  
危割半孔懷情失侶永歎息已斷伯牙絃忍聽山陽  
遂相對說淒淒忍窩吾族叔浮世一夢場于今始大  
覺先後不須論畢竟同歸宿知君亦達觀逆旅無不  
足身後亦何悲肯堂有所託文豹死有皮不朽在巾  
櫝

病後次李戚洛應見贈韻

虞琴彈罷邈薰風二豎偏侵禿頭翁十日鬼關猶不

化百年人世竟何功回看萬事皆雲外遮眼殘書亦  
霧中多謝故情尋寂寞有時詩話與之同

次萬歸亭韻

簷後蒼厓檻外江仙家亭子樂浪邦名山可敬金兄  
案畫閣應羞玉女牕試頰萬川終有合方知一理本  
無雙九旬老子前遊處夜夢依依渡石杠

月城崔氏於其先祖八友亭遺墟豎短碑是  
夕與鄉人共飲宴仍行鄉飲禮崔景至誅近  
體一首要座客酬和忘拙和呈

八龍餘澤栽培新桑梓百年物色彬一榦分時知本

本千枝連處見親親羹牆孝忠遺墟石揖讓淳風故  
國春花樹韋宗非盛會未聞酬酢與鄉人

挽安琢之璞重

可愛人如玉琢之字不誣連城無價寶三刑有司辜  
羨質終埋土幽冤曩失珠他山一老石獨立更誰須

挽李文朝範

密邇先生院蕭然處士廬歌從擊壤和嘯好登皋舒  
遐壽仁從驗多孫慶必餘自今鄉黨裏誰復古人歟

挽李用晦

雲樹蒼茫十載患忽驚華鶴上仙期百家汎濫遺科

學千首風流逼古詩誰遣磻溪藏僻處等閒漁父老  
明時山陽一曲吾無淚笑指桑榆日影垂

挽李汝敬曾範

櫟翁爲遠祖竹老有曾孫家世遺風舊鄉鬢宿望尊  
交情元自別戚誼不須論暮境相尋好已矣送九原

挽洪文載文二首

厖眉黃髮貌淳淳疑是洪荒上古人惆悵古人今不  
見老松瘦竹謾傷神

粉榆古社好相親先隴同行十世鄰厚誼將來應不  
替小孫攜卷往來頻

挽崔仲蘊

質庵天質素文雅夏添光妙歲龍頭榜 清朝雞舌  
行殤冤呼不得仙馭去還忙相弔東都士止翁亦已  
亾

挽李乃彬宜煥

平地丹丘邃誰知有逸民杜門常守拙環堵獨安貧  
鐵畫心要直霞觴味得醇病牀曾厭聒尻轄竟尋真  
裕後兒傳業逾耆壽驗仁肩隨同隊設心許一生親  
幾望停雲暮旋驚落月晨荒詞替麗露遙送比邱窀

次李參奉野淳寄贈良洞諸益韻

詩中一字苦難容枉費敲椎手裏筇豪士風流驚句  
句高樓百尺臥元龍

挽孫肅玉

雞川餘澤遠玉滴有傳孫十世愚翁宅百年晦老村  
風聲元是舊天賦亦云敦器宇殊沉靜襟懷更敞軒  
怡愉源百行遲重慎庸言文翰兼華實工夫漑本源  
匡山杵費鍊荆璞玉生溫為重庭闈命不辭場屋喧  
沼蓮華已晚風樹淚餘痕間歇桑榆境逍遙水竹墩  
雲根奇作岫冬葉翠成藩雅調琴三尺豪情酒一樽  
貧寒分素定年德望俱尊每忌西神逼還遭二豎怨

稀年非但化惡境遽驚寃地下兒相對家中長孰存  
三時孤寡哭千古幽明冤可惜榷楠質空埋草莽原  
圖書餘舊壁花卉任荒園後死寧無痛久要不可誼  
交情如水淡俗態恥雲翻詞藝歸前戲塵編好細論  
尋常資直諒萬一警愚惜老去稀聯榻年來各閉門  
詩筒頗往返書尺每寒暄四老丁寧約一遊雲水軒  
不畱重九節虛度再三番塵網苦難脫仙輶忽已騫  
有誰青眼對無處白鬚掀應逐止淵駕周旋紫掖垣  
相看老阮淚忍向雪山蹲先後丹旌發慘淒白日昏  
同歸也不遠此別復何恧悔禍他年慶應知在後昆

甲戌春邁疥疾首尾三朔餘苦不可言及其

稍間沉吟得古風五十韻以道其憫鬱之狀

老人苦多病如何又疥瘡此疾主搔痒人所不堪當  
况復七十老其苦何可量原其所染來必於他人傷  
翁已廢蟄久不與人徜徉緣何得此為其故不可詳  
從前行乞人往往寄宿堂此翁性素柔不為牢塞防  
多與同寢席或此致不祥始發手指間點點必成行  
漸次遍一身甚至目之睚稍大如豆菽微細如粟梁  
厥或粟子大濃爛似癰瘍尋常不堪痒手爪長爬揚  
一刻未暫休欲忘不能忘有時燥火上直欲發出狂

手容何能恭色容何能莊無以攝威儀無以整冠裳  
亦或痒少定寂寞守空房卻恐貽害人不近鄰舍牀  
有人間或來起去還忽忙方其恣意搔快樂殊未央  
搔極必見血刺痛還自傷果然昔賢語悛事必為殃  
問人試醫治治藥百千方隨問輒欲試取舍迷短長  
衆人大同言都不如砒礪砒礪亦至毒誤用或致戕  
人生萬病中此何氣不臧月令載是病以寒暑乖常  
近聞州里間此症多動勦職緣時氣失燮理孰主張  
大運固如此身危那可禳自分無可柰到此誰怨望  
乃知一忍字第一藥之良古人有定力禍患恬饒湯

况此么麼疾何必生恟恒猶勝疫癘虐比比多死亾  
忍之復忍之時久當出場推之世間事勤苦皆可嘗  
如今吾所苦亦已越關梁莫愁人厭避獨處也不妨  
俚俗間雜語太半耳欲障莫恨己莫出老醜堪伏藏  
門外一步地世路多羊腸靜裏好披覽案上有書緗  
卷中羣聖賢至訓猶洋洋灑然洗曾襟不啻服清涼  
從茲尋坦道餘日聽蒼蒼技藝堪自笑詩句且激昂  
窮居老病又添疥疾獨與梅兄爲伴聊吟一  
絕

老翁搔疥坐窮廬門巷蕭然俗迹疎獨有西湖清瘦

貌朝朝相對故人如

挽李修撰元祥三首

大雅名家範宏詞禮部才人間金馬待天上玉樓催  
仁壽蒼穹靳聲譽造物猜相逢多士弔吾嶺運何類  
判非今俗士真是故家孫先訓傳無忝平居行有源  
未終十世慶何恨九泉冤感激歸魂淚冥途亦曠  
恩

浮名猶外物良貴自天真蓮桂人爭慕芝蘭我所親  
早知逢沴鬼寧恥遁昌辰垂淚白頭老客冬厠賀茵  
自橫溪書社送墳麓先生文集欣感披玩詠

懷二絕

河南伯叔又尼陽一部墳麓寶匣藏着取兩鍾夏唱  
和絕絃餘韻復洋洋

杜巷蕭然畫掩扇誰尋白髮老儒生書從太古窩中  
至獨帶春風不世情

懷鄭季常

止翁已去雪翁隨浮世知音更有誰只有煙霞谷口  
老子今不見再周暮

挽崔景至

冰蘂家聲玉樹姿南州雅望月朝推名場小得非長



價學社新糶儘好規香案應驚同室老絳帷還失一方師此行若見止淵輩為說斯翁踽踽悲

挽權虞卿東高

梅社遺芬遠農窩隱德傳儉勤安素履書籍護青氈賢幹應支戶稀齡可必天從前事契厚追憶倍潸然

挽克難齋權士規濟敬

先德曾薰有道門百年家範見仍孫循循認是蘇湖弟昔我逢場問不煩

荒歲歎

歎息復歎息歲運何極否嘗聞歲饑穰十二一大至

禹湯尚不免何代無災異吾生今八耄歎荒亦屢值  
初見今甲戌大殺無與譬太甚旱熯災粵自壬申始  
壬申及癸酉荐飢兩年比民生既艱辛天災亦可止  
那知今年夏大地無麥穗三農十旬間赤地方千里  
稻秧半未移移者亦半瘁秋霖又浹月田疇水瀰瀰  
農民何所收十百無一二村村少炊煙况復窮春匱  
富人或難繼可奈貧窶子處處行乞人連絡走街市  
朝暮覓飯聲喧聒亂人耳千山葛根掘萬落松皮剝  
女眾掇菜茹刮盡原野地白晝大路中行劫羣起恣  
賣妻與鬻子殃禍及墓隧或有弱肉吞人類為虎豕

斗米過二百未見前古史酷寒兼毒癘四境連殭屍  
氏族不可分無人來檢視居民不勝墮野獸爭相飼  
朽穢觸處積行人皆掩鼻哀哀萬赤子 聖代胡有  
是不意垂死年遇此不淑矣儒冠迂拙客豐亦啼家  
累老羸當此歲糊口其何以惟恃獨子養奔走反哺  
食每月一石穀 國恩無涯涘自媿無用物徒爲倉  
粟費白屋任艱苦漆室謾憂息當今廟堂賢誰復鄭  
俠似畫此飢民狀獻之 九重裏遠想三代盛預爲  
水旱侍常時三年食必有一年置九年餘三年府庫  
常儲峙所以當世民無有溝壑棄我 朝留庫積亦

古聖王意遵守四百年邇來漸解弛徵出罄部屋操  
縱在逋吏倉積可哀痛太半是糲粃一遇如此歲捐  
瘠何可庇或恐不軌徒嘯呼羣黨萃未論前古蹟試  
觀西北事西北數年前凶荒政如此果有城邑掠畢  
竟 王師出乃知飢饉極其禍致凶器猶幸我嶠南  
未聞抱鼓起或言鄒魯俗不同西北鄙我知 父母  
邇盛澤浹民髓蓋此 聖世災莫詰所以致自古水  
旱遇聖德非不摯氣數或不齊先儒有定議生靈自  
無祿厄會有難避雖然古聖后不曰時運痞虞帝引  
警予殷王切責已固知吾 王聖前后同一揆宵旰

懼庵文集卷三  
十七  
警戒意從此益倍徒民食重邦本輔相慎燮理中和  
位兩儀雨暘順五氣轉災為吉祥天運可必耳豐年  
百穀穰將見萬億秭節用昭儉德儲積後患備金石  
堅舊制倉鼠無或肆充溢紅腐積文景豈專美斗米  
三四錢不獨貞觀治環東億兆民共躋仁壽址野老  
獻曝誠自有不容已癘疾此一物須臾願無死康衢  
好煙月含哺擊壤喜無疆 宗社福千禩與萬禩

次忍窩族父見贈韻二首

辭歸今幾日幾日如三秋每對闕青眼暫離搔白頭  
最憎強鬼逼謾戲老人遊可惜東君節先歸不我畱

歲荒重以沴春景凜如秋大地無容足浚村故縮頭  
溪依三會笑川逝舊交遊且待時憂霽筇鞋任去畱  
時寓虎溪傍此吾兩老與洪川權友所遊之地而人  
事忽變故領聯云

虎溪寓所謾吟示同棲權君文玉瓚煥

七旬浮世少開顏三笑遺墟半月間苔磯日永觀魚  
戲竹塢風清聽鳥喧忘年好對青春伴懷舊難追大  
夜還溪山一半真吾願安得攜家老此間古人懷  
友有懷舊賦此悼洪川權友

次許貞簡公父子 旌閭時韻

懼庵文集卷三  
恭惟貞簡許先生父子貞忠日月明賀席無心啖肉  
味危樓有淚聽鶉聲黃麻渙渥渥須 神聖青史榮名  
等朴成桑梓舊墟連彩楔何人不激秉彝情

次忍窩族父韻

人間七十亦無多吾輩行年况復加公道不曾饒白  
髮神方未必驗胡麻康衢刺得昇平樂良日何須大  
耄嗟抱月飛仙猶不羨達觀終古有東坡

乙亥秋李進士士溫鼎基以玉院首席招邀  
數十老伴一宿于院轉宿定惠寺又宿龜岡  
院暢叙而罷士溫詠近體二首李進士望道

鼎儼 又拈韻詠二首以求和士溫又詠望道  
韻寄示故并和以呈

君招適我願羸馬促治裝八耄還忘倦三庚僂覺涼  
逍遙無俗累酬酢有詩章真率耆英會何須羨洛陽

右和呈士溫 在玉院

不盡溪堂興筇鞋夏理裝元非尋寂默直欲到清涼  
洗濯徵臺號光輝想日章偏憐人少一鄰遂聽山陽

右夏步前韻 在定惠寺

千秋覲醉地樽酒又移筵時節西郊迓風流洛社傳  
團圓須竟夜交契摠忘年別後相思苦知君亦復然

右和呈望道

叵耐寂寥巷難回笑語筵有懷詩句和無計酒盃傳  
相別非多日前期異少年蒼顏與白髮秋夜夢依然

右夏步前韻

三省園討後可耐別離筵顏範難常對音徽且續傳  
念吾先一日得子伴餘年歲暮相期處壇杏翠苑然

右用望道韻和呈士溫

避沴氣寓處于大洞故從弟嚮五家獨坐感

念詠二絕

君其何逝我今來架上塵篇不欲開獨坐虛堂真夢

境依然顏面百千回

孤胤連仍獐榻中兒孫次第鳳毛奇嗟君地下知耶  
未獨我人間喜且悲

次權義士遺事韻義士名復興享忠烈祠

蒼蒼松柏歲寒時烈士風聲憶險危蹤跡不教妻子  
識精衷應使鬼神知其行乃是蹒跚者一死元非倉  
卒爲欲識忠臣眞配偶君看彩楔與豐碑

客冬寓中與忍窩族父有唱酬韻族姪觀永  
次是韻以獻而此姪適遭天憾語甚悲苦吾  
於是姪期待不少而恐其意思索寞有害於

前程以是韻寬譬之

黃髮黎顏八耄翁癡心欲與少年同後生胡比殘齡  
老先輩猶稱小學童莫遣窮愁沮意向且將經訓灌  
曾中郎師亦數西河罪蓋以殤哀失兩瞳

李君之翰來訪畱近體一首遂次其韻

十日陰霖杜巷廬故人相見喜何如夕餐淡泊還忘  
肉夜話從容勝讀書愧我梧臺巾裏石憐君草野璞  
中踞白頭倘及明春暮杏下輕風面上噓

次李南廬望道贈鶴城李正郎觀吾韻并序

李上舍與諸同志作東南遊賞之行尋正

郎家為數日飲及還主人以酒贈行而盛  
以鐵瓶上舍笑而戲曰此瓶吾當不還云  
歸後為詩乃還其瓶亦一風流好事也為  
余道其事要余次之遂步以呈

從事青州亦蔚州鐵腸風味勝瓊舟守時忍默仁人  
口擊處長歌烈士喉主老三酬情貺溢南翁一笑戲  
言休青絲好結同心契作伴詩筒取次投古人以玉  
盃為玉舟而今以瓊字代用蓋做杜詩以金盃為玉  
盃之體也

挽鄭立齋宗魯

嶠南賸得鍾文明奕世名家又篤生保養已從林下  
秀光輝不待柏臺榮江山自古多經濟鄒魯如今失  
老成賴有瑤琴藏寶匣玉溪餘韻大其聲

次龍山書院 賜祭時會中韻

風霆烈烈是何年名節遙思險水天丹心未老龍蛇  
後白首還忘虎豹前遂令宇宙綱常重不與皇王世  
界遷 九重輿感重回甲地主宣 恩祭祀虔是時  
風雨雷霆連作十日故云

次聖山祠奉安時會中韻

烏川夫子海之東杖屨遺墟俎豆宮義起陳徐尊祖

禮文從鄒魯尚賢風先生斯可祭於社鄉里非徒號  
曰公自此青衿添矜式玉山西面紫霞中

次李洛應韻

慇懃東郭老竹杖訪苔庭春暮期風詠月朝恥俗評  
畦畛君不設困廩我須傾遙憶周卿士求箴在耄齡  
忍窩族父有共會迎春之約以余適有疾不

赴因吟示一絕謹和呈二首

老病乘寒涉月留佳期虛負菜盤遊從今肺腑收春  
氣且待元辰共趺休

八耄殘年意思新自家靈腑亦回春須從此日日新

了百歲和風滿一身

挽孫漢五星德四首

去年寒食達田庵七日連牀共笑談  
叵柰今年寒食節嗟君獨向達田南

簷前松樹舊庭培孤直風標老不頹  
畢竟同歸凡卉盡雪蒼寒月獨徘徊

名家舊寶有青氈十世慈孫潤色鮮  
了得一生尊祖事也應無憾報重泉

白頭俱是故家兒先世交情爾我知  
一語無猜遺挽語吾今又作送君詞

挽孫進士天弼星說

八耄吾知哭死癡斯人非慟慟為誰  
彬彬翰墨君餘事淡淡襟懷我素推  
蓮籍曾看連代耀棣華邗意一時委  
殘年此別應無幾卻為東都後進悲

次孫乃遠弘九韻

窮廬忽到故人行忙下匡牀倒屣迎  
濁酒家貧慚未進新詩老健謝先成  
常時不見憧憧患猝地相逢脉脉情  
遲暮前期邗易說向來餘恨水雲亭  
雪坡在時屢有雲亭之約而未遂翁  
已作古今乃遠又有是約而未可必故云



挽李聖應鼎濟

安得長風駕爲君  
訟玉京膏肓必欲殺  
聰敏若爲生  
莫試宏詞策  
終歸處士旌  
忘年黃髮老  
秋翰倍傷情

次安國寺會中韻

雲住山中雲淡天  
青衿十里綠陰穿  
英材妙選東都  
士耆老渾成別界  
仙剩得浮生閒  
五日不知塵世是  
何年可憐杜巷一  
黃耆耆社同參  
未有緣

次題雲住山韻

名山安國梵王都  
慧眼何年指象愚  
嶺衛將軍誰敢  
侮峯鄰道德不爲  
孤中天偃蹇俱瞻  
爾平地昂藏自

笑吾可惜英靈招  
異類煙霞好處入  
浮圖

次耆老會韻

文垣高設碧雲巖  
座上耆英什二三  
山藪芳香非肉  
飽石泉清滑似酥  
甘風情壓少詩先  
唱雪鬢回春酒  
半酣五日畱連猶  
未足仙筇又向德  
溪潭

次雲谷會中韻

前遊雲住已超然  
雲谷今遊穩勝前  
名德揭虔新廟  
宇大賢畱詠舊林  
泉佳辰雨霽黃梅  
月別界風噓紫  
錦煙三日團圓文  
酒會他年故事自  
今先

虎溪祠會中次李望道韻二首

勝會曾聞洛社傳風流今覩景齋筵榆陰不畏三更  
節紅樹還忘八耋年遺馥好尋梅舍裏古圖休詫虎  
溪邊茲堂好事從今始來歲佳期且勿愆  
文會溪堂滯雨時老人無怪不言歸殘年每歎離羣  
久勝地還忘作客遲入戶泉聲喧鼓吹懸簷溜沫散  
珠璣明朝各自歸家後一夢依依長在斯

虎溪文會孫兄乃遠有行聲而竟不至罷會  
後以詩遞贈故次韻以謝

華旆先聲有浪傳欣然扶杖赴溪筵徒勞企行經三  
日自覺齟齬伴少年短髮空搔霖雨裏片心長繞水

雲邊殘齡一會其徐緩黃菊佳期且勿愆

次李洛應韻

吾儕盛會太平年少一罇前為悵然明日筇鞋移北  
院可能清旆賁文筵

次蓮龜亭韻

忍窩公所居

平生康濟抱遲暮小丘盤軒敞空迎月牖寬好對山  
雙龜常捧枕六甲幾循環大隱於斯足何須洞壑間  
公有雙龜枕

次東湖書社韻

鴈鴨湖亭半夜開千年名奪鳳凰臺浮草繁華何處

去孤雲風月有傳來景以清新多得句會因真率數  
傳盃琴書最好江山裏別有斯翁獨樂哉

戊寅春有中樞加資之恩吟近體一首示

座中求和

八十之年百不爲人間一蠹太遲遲 先朝已荷非  
常 寵衰暮那堪又 特資緋紫榮光誇里閨斑斕  
舞袖戲孫兒滿觴春酒皆 恩賜遙祝南山萬壽期

感 恩歌

懸玉之日有四句韻語而未盡多少蘊蓄  
遂復詠長短一篇不拘格律惟意所發荒

蕪之語兼以昏耄聊以自叙

聖上臨御十八年杜巷老人年八十老人生長太平  
老太平康衢白日閒出入人間榮寵夢已斷只待閤  
家符牒朝暮到忽於春王正月夕丹鳳含來紫泥誥  
蹶然而起忙下牀雙手擎來伏而覩糞土微臣姓名  
下大書通政大夫者蓋此 聖世優老典凡庶年限  
九十也以吾曾忝一半級比他凡庶先十載微衷感  
激果如何環顧其中不勝忸怩媿生來性質極孱劣  
木偶襟裾無半解 先朝宣召一命 寵在此愚臣  
猶分外如何此生太支離又煩 恩數及老耄老而

無聞久不死是爲賊聖師猶責原壤老亦已久不死  
今又添以爵此物終歸名器盜腰緋頂玉里閤間恐  
被傷人拍手視雖然傷人且莫笑此爵自與他爵異  
王家爵命何等重多見青雲人力致紛紛東郭乞  
憐兒白晝驕人誠可恥人生壽夭在司命非我求之  
天所賜不出門外一步地 九重恩渥乃自至翻嫌  
海上八十老漁釣至周亦多事而况是爵最清閒正  
合吾儂迂且懶既無一公事黜陟何預治與亂又無  
一斗祿尸素誰譏在家食在家惟孝友兄弟素王爲  
政亦不在干祿相當吾職此莫過不換三公之貴寵

此語非誇聊自慰更有孤露無窮痛先人行德在公  
誦餘事文華擅一代壽不稱德名未遂至今東都士  
夫慨何圖不肖謬通籍又以年高優 寵渥乃知先  
庭種德不食報畱與後來餘慶及多謝鄉鄰同此慶  
慙慙賀客屢相接此夕不可無我酒樂與親知同酬  
酢貧家設饌任真率杯盤何必計豐薄佳辰正值仲  
春殷庭梅爛熳山花灼中堂兀然坐金狄四座親朋  
非疇昔春天行鴈已歸盡芳草池塘多感目賴有座  
上同室老黎顏鶴髮俱八耄共閱滄桑無限變長吟  
短唱悲喜溢鄉閭二三情厚交不妨年紀稍間隔沾

沾談笑坐忘形不覺西山白日沒從茲餘日問幾何  
卽今歸化無攸恨祇恨青春黑頭日虛送光陰垂大  
限別有天爵高於此德義之尊窺未得比之衛武作  
箴曰此翁猶是少年客在我誠心苟自盡未死之前  
須努力猶恐鸚鵡徒能言不患桑榆餘景迫荒詞蕪  
語作此歌西望長安百拜祝涓埃寸忱報無路惟願  
聖壽千歲萬歲無窮極

玉院會席口占二絕示座中

一生偏愛此溪山乘興年年每往還八十年來凡幾  
次黎顏又此綠陰間

青山不老水悠悠物色無非舊日遊今夕登臨誰故  
伴滄桑人事使人愁

次崔子成玉龍潭精舍韻

聞說龜山之北厓故人亭子窈而佳鬧中久厭爭先  
路靜裏應尋向上階題詠無非情性發池臺不是等  
閒排仙區似隔三千里白露蒼葭謾寄懷

戊寅除夕詠懷同忍窩餞歲

二老分明夙世因一門生長九回旬年年此夜同迎  
送歸日應同百世春

次李士仰鼎搢子舍聞喜宴韻

惺庵文集卷三 二十八  
幽香不掩揭軒檐擢桂榮光寶樹枝具慶北堂康健  
日重熙東國 聖明時十年經學行將試奕世家聲  
定不虧好是綠陰芳草節觴歌爭和鹿鳴詩

次孫君翼謨韻

槐翁不祕篋中琚川鯉含傳巷老居八十已忘名利  
釣故人詩句敵璜書

次孫乃遠重牢宴韻

南國天桃際盛時仙家伉儷舊佳期天上夙緣雙吹  
遂人間偕老再交卮彩舞猶依青鳥妙珍羞不啻玉  
飴奇浮世百年稀有慶分明積德驗於斯

挽鄭季常四首

歲運長吁值白龍鄭鄉千古大儒終如今又哭公之  
逝何似當年哭鄭公

雙峯爲祖魯庵昆詩禮遺風學有源追孝百年能事  
了知君無媿故家孫

煙霞洞裏棟梁姿蓮籍浮名姑舍爲別有彙編書一  
部晚年功業在於斯

遲暮交情倍少年那堪衰病兩相纏藍輿一會終虛  
負從此前期指九泉

次李進士仲謙鼎益龜巖精舍韻

幽澗古院洞蕭灑小亭空眞樂尋山水虛名恥斗箕  
甘華隨分劑窮究到衰遲爲賀林丘遇斯翁乃取斯

挽閔進士聖則閭二首

青松白鶴古仙區雅行君非叔世儒隨分爛衫安淺  
淡潛心黃卷玩膏腴堪嗟故壑虛三秀何計荒山奠  
東蜀種德由來餘慶遠須看寶樹滿堂隅  
論文卻憶少年時傾蓋還同竹馬知已覺心期先有  
昭夏看名跡輒相麗殘齡久斷停雲望浮世那堪逝  
水悲冥路若無頭嶺隔逢場握手未應遲

贈李洛應徵五奎鎮并小序

積年老藝中康村諸友頻頻辱訪且要我  
慇懃吾亦爲紆鬱計以端午日扶筇往尋  
以做數宵團圓是亦殘年勝事也臨別贈  
近體一首以識之

自笑風流及老年康衢步步太平煙佳辰強記天中  
節老醜休稱地上仙幽抱暫開尋晚契厚情多感設  
波筵重來此後非吾料只願諸君每貴然

挽權晚洲无悔以復

未及摳衣厚老門故庭猶見典刑存鶴松仙分無塵  
累詩禮儒風有本源壁沼採蓮非展抱青山埋玉尚

餘冤至今情  
貺長扶我時  
復摩挲拭淚痕

挽任持國萬濟二首

東都冀北士稱多才俊  
如君復幾何  
浮名得失非輕重  
虛老良騏有足嗟  
鰲背仙區有主人  
風流詩酒任清真  
遙憐鶴上昇雲處  
寥落寒塘物色顰

挽孫乃遠

山陽一曲淚無痕  
此別榮君向九原  
皓首重婚宜伉儷  
青氈遺業好兒孫  
雲亭興盡三宵枕  
閬苑行尋萬里轅  
只惜東都無處士  
暮年詩酒更誰論

次忍窩族父韻三首

歲前遇篤疾沉綿月餘  
暫有減勢族父以詩寄賀呻吟中僅僅和呈

莫謂殘年病暫瘳  
暫瘳還怕久遲留  
鳩筇追後猶云幸  
龜壽無疆敢望俱  
兩老年皆八十餘  
歸期莫問夏何如  
存亡姑舍他年事  
離索那堪此世居  
幾處重房幾累茵  
園林只詠雪花新  
多公白屋恬寒苦  
一念先憂天下人

挽崔翰汝二首

孝友家聲翰墨俱  
東都一代老成儒  
可憐璞玉終埋



沒殘月淒涼弔石湖

兒女于歸不必隨如何行色暮年為畢婚恰遂尚平  
願碧水丹山去不遲

懼庵先生文集卷之三

